

PROGRAM KAYUHAN MAIPS PEDULI SEMPENA TITIPAN KASIH SPRM, UniMAP

Oleh : Suhaiza Ghazali

KANGAR, 23 Sept – Seramai 100 peserta menyertai Kayuhan Majlis Agama Islam dan Adat Istiadat Melayu Perlis (MAIPs) Peduli sempena Program Titipan Kasih anjuran Suruhanjaya Pencegahan Rasuah Malaysia (SPRM) dan Universiti Malaysia Perlis (UniMAP).

Kayuhan itu diketuai Duli Yang Teramat Mulia Raja Muda Perlis, Tuanku Syed Faizuddin Putra Jamalullail. Turut serta dalam program itu juga, pengurusan tertinggi dan Mahasiswa UniMAP, Team Tayar Golek (TTG) serta pegawai-pegawai SPRM.

Baginda yang juga Yang Dipertua MAIPs memulakan kayuhan dari Kolej Kediaman Tan Sri Aishah Ghani, UniMAP, Wang Ulu dan berakhir di Muzium Kota Kayang, Kuala Perlis.

Sepanjang perjalanan, baginda telah berkenan menziarahi tiga buah rumah asnaf dan menyampaikan sumbangan zakat kepada 120 orang asnaf. Di samping itu, Timbalan Ketua Pesuruhjaya Pencegahan SPRM Datuk Shamshun Baharin Mohd Jamil turut menyampaikan sumbangan bagi pihak SPRM.

Program Kayuhan yang telah memasuki penganjuran kali Ke-71 itu telah berjaya menarik minat Mahasiswa UniMAP terutamanya bagi menjejaki dan menyantuni asnaf agar sentiasa prihatin dengan insan yang kurang bernasib baik.

Dalam program yang sama juga turut berlangsung Program Zumba bersama DYTM Raja Puan Muda Perlis, Tuanku Hajjah Lailatul Shahreen Akashah Khalil.

Program zumba itu disertai Puspanita SPRM dan Piskanita UniMAP. Di akhir kayuhan, semua peserta bersama Tuanku Syed Faizuddin menelusuri sungai Perlis dengan menaiki bot di Pengkalan Jeti Tok Kuning.

